

Zo zegge wi-j dat, zo schrieve wi-j dat!



Oost-Gelders Streektaaldictee 2015

Ni-jsbrief januari 2015

Beste vrouwluu en mansluu, liefhebbers van de Oost-Gelderse streektaal,

Dizzen ni-jsbrief is eschreven in één van de völle Achterhoekse en Liemerse dialecten. Want wi-j wet allemaole dat iedere plaatse wel zowat zien eigen dialect hef. Aoveral praot ze anders, en daor is niks mis met.

Dat iederene in Oost-Gelderland 't gesproken dialect van elke plaatse op dezelfde maniere kan opschrieven kump deur 't werk van 't WALD. Wanneer de luu de WALD-spelling gebruikt en de systematiek een betjen deurhebt, kan de man uut Lengel foutloos opschrieven wat de vrouw uut Hengel steet te verkondigen. En de vrouw uut Grolle kan ow in geschreven weurde dudelek maken wat den Wehlsen präötjesmaker eur hef probeern wies te maken.

Nao dizzen inleiding dri-j belangrieke punten.

- a) Op **19 meert 2015** wördt 't **Achtste Streektaaldictee** ehollen. Veur iederene, veur Achterhoekers en Liemersen. Net as andere jaoren in *De Golden Karper* in Hummelo. De werkgroep die dit streektaaldictee organiseert en samenstelt is al druk bezig met de veurbereidingen. De luu die al wel 's eerder hebt met-edaon wet dat wel: zo'n aovend is völle meer dan een schools dictee. Wi-j ziet 't veural as een gemudeleken en leerzamen aovend met diverse vormen van Oostgelderse cultuur. Met een dictee, met een präötjen over de streektaal, met een prieswinnaar en niet te vergaeten met muziek en zang in de streektaal. Met deelnemers, bezukers en samenstellers die allemaole völle van eure streektaal holdt.

Daorumme:

- Noteer d'n daotum van **19 meert 2015** in owwen agenda en hol dén aovend vri-j.
- Wi-j könt nog best meer deelnemers gebruiken. Vraag an ow familie, owwe kennissen of buurte of die geen zin hebt met ow met te gaon. Metdoen is belangrieker dan winnen en i-j staekt t'r ook nog wat van op. Baovendien is 't parkeren gratis.

- b) In de tweede plaatse kö'w ow meedelen dat de website van 't Oost-Geldersstreektaal dufteg onder handen is enommen. Kiek maor 's op www.streektaaldictee.nl Hier kö-j ow ook opgeven veur 't dictee.
- c) Tenslotte melde wi-j dat binnenkort op de website www.streektaaldictee.nl ook nog een spiekbriefken kump met *geheugensteuntjes* veur 't streektaaldictee. Hierop staot een antal WALD-spellingsregels, veural die waorbi-j de deelnemmers an 't dictee vake onneudige fouten maakt. Handig en verstandig um die regels, as veurbereiding veur 't dictee, nog 's goed nao te laezen!

I-j ontvangt dizzen ni-jsbrief umstreeks Drie-Koningen van 't ni-je jaor. 't Midwinterhoornblaazen is af-elopen, maor 't ni-jjaorwensen kan nog de hele maand. Wi-j wenst owlou van harte een goed en gezond 2015!

Met de harteleke groeten
van de Werkgroep Streektaaldictee Achterhoek-Liemers

Deze nieuwsbrief wordt gestuurd aan iedereen die eerder aan een streektaaldictee heeft deelgenomen of de dictee-avonden heeft bezocht. Bovendien aan iedereen waarvan wij vermoeden dat deze adressant van gesproken en geschreven taal houdt. Van de Nederlandse taal en in het bijzonder van de streektaal in Achterhoek en Liemers.